





# Акафист

## святителям Феодору и Иоанну, епископам Суздальским, чудотворцам

### Кондак 1

---

Избранныи угодницы Господни и пастырие предобрии Церкви Христовы, града Суждаля заступницы и теплии о душах наших молитвенницы Феодоре и Иоанне, отцы богоноснии, пение похвальное вам от усердия приносяще, молим вы и просим: яко имущии дерзновение ко Пресвятей Троице, предстательством вашим от всяких бед нас свободите, и наследники Царствия Небеснаго нас соделайте, да благодарственно вам вопием:

Радуйтеся, святителие Феодоре и Иоанне, предивнии чудотворцы.

### Икос 1

---

Ангелов подражатели и человеков наставницы святителие божественнии, вы, яко

ангели благии хранители, Отечество ваше  
земное свыше отечески назираете,  
богоприятными молитвами вашими, вся благая  
и душеполезная нам у Господа ходатайствуете,  
нетлением мощей ваших и чудесы преславными  
уверяюще нас, яко и по смерти живы суще, вся  
можете о укрепляющем вас Христе. Темже и  
зовем к вам с любовью теплою:

Радуйтесь, православия насадители.

Радуйтесь, благочестия подвижницы.

Радуйтесь, апостолов достойнии преемницы.

Радуйтесь, Евангелиа Христова неутомимии  
благовестницы.

Радуйтесь, первопастырие святыя  
Суждальския Церкви.

Радуйтесь, столпи непоколебимии  
непорочныя веры.

Радуйтесь, вдов и сирот питателие и  
заступницы.

Радуйтесь, беспомощных скории помощницы.

Радуйтесь, болящих врачеве благодатнии.

Радуйтесь, о любящих и чтущих вас  
предстателие.

Радуйтесь, светильницы богосветлии, души наша озаряющие.

Радуйтесь, отцы премилостивии, дары спасительныя обильно нам низпосылающие.

Радуйтесь, святителие Феодоре и Иоанне, предивнии чудотворцы.

### **Кондак 2**

---

Видя Господь всю пагубу душ человеческих, идолослужением языческим омраченных, по неизреченному человеколюбию Своему, восхоте призвати я к свету истинныя веры, и тебе, отче Феодоре, избрав в сие великое служение, да благовестиши людем Суждальским Евангелие Христово, и будеши пастырь добрый новопросвещенным и словесным овцам, словом и примером наставляя их богоугодно пети всех Творцу: Аллилуиа.

### **Икос 2**

---

Разум благодатный воистину являете отцы богоноснии, дела и словеса вашими, все бо житие ваше земное бысть исполнено всяких добродетелей. Темже и Христос, видя ваша добрая дела, чудеса преславными обогати вас при жизни и по смерти, и сподоби вечнаго

предстояния у Престола Своего Божественного, идеже созерцающе величество славы Его, и наслаждающесе блаженства райскаго, помяните ны чтуция вас звании сими:

Радуйтесе, нищету духовную возлюбившии.

Радуйтесе, непорочное сердце стяжавшии.

Радуйтесе, милости и сострадания преисполненнии.

Радуйтесе, сотворившии и научившии, и велии нареченнии во Царствии Небеснем.

Радуйтесе, Духа Святаго сосуди избраннии.

Радуйтесе, друзи Христови возлюбленнии.

Радуйтесе, терпения и кротости образы преизящнии.

Радуйтесе, святителям похвало и иноком наставницы.

Радуйтесе, христоименитым людем ко спасению руководителие.

Радуйтесе, скории о душах наших предстателие.

Радуйтесе, безмезднии телес наших целебницы.

Радуйтесь, святителие Феодоре и Иоанне, предивнии чудотворцы.

### **Кондак 3**

---

Сила Божия осени тя, святителю отче наш Иоанне, егда напрасное изгнание от престола твоего святительскаго незлобиво претерпел еси, подражая Агнцу Божию, взявшему грехи мира и от иудей пострадавшему даже до смерти на Кресте, Егоже Крест и страдания поминая, нивчтоже вменил еси поругания и изгнание, зовый скорбьми испытывающему тя Подвигоположнику Иисусу: Аллилуиа.

### **Икос 3**

---

Имея вас святителие Христови, светильники чудесы присно сияющия, Церковь Суждальская светло о вас красуется, яко невеста преукрашенная ваших подвигов красотою, и благодаряще Церкви Зиждителя, вам, Его избранным угодником, сия песенныя дары приносит, глаголюще:

Радуйтесь, иерарси богомудрии, тьму языческую разгнавшии.

Радуйтесь, архипастырие ревностнии, ко Христу приведшии многия души человеческия.

Радуйтесь, яко мзда ваша многа на небесех  
есть.

Радуйтесь, яко восприясте почести вышняго  
звания.

Радуйтесь, наследницы славы невечерняя.

Радуйтесь, сопричастницы радости  
нетленные всех святых.

Радуйтесь, пищи райския обильно  
наслаждающийся в селениях праведных.

Радуйтесь, обретшии вечное всесветлое место  
упокоения.

Радуйтесь, благодатию Божиею ведущии вся  
наша скорби и нужды.

Радуйтесь, не оставляющие нас своею  
любовию и отеческим состраданием.

Радуйтесь, присно просящие нам у Господа  
дары благости Его.

Радуйтесь, никогдаже забывающие нас в  
молитвах ваших благоприятных у Престола  
Христового.

Радуйтесь, святителие Феодоре и Иоанне,  
предивнии чудотворцы.

## Кондак 4

---

Буря злобы языческаия возшуме на тя, святителю Феодоре, егда пастырски подвижался еси о просвещении верою Христовой людей Суждальских: обаче ты, яко воин добрый Царя Небеснаго, кротостию злобу побеждал еси, старцы и юныя умоляя с долготерпением многим и любовью отеческою, оставити суетное служение идолом, и познати истиннаго Бога, в Троице славимаго и покланяемаго, Емуже присно пел еси: Аллилуиа.

## Икос 4

---

Слышим вы, отцы богоноснии, и по смерти, яко трубами многогласными, чудесы вашими благовествующия нам всемощную Силу Христову, Еюже смерть попрася и живот вечный даровася человеком, Еюже и ваша тела нетленна пребывают, подвизающе на чада ваша чествовати вас похвалами сими:

Радуйтесь, нетления благоухающии цветы.

Радуйтесь, бессмертия богосветлии и немерцающии лучи.

Радуйтесь, смирением высокая стяжавшии.

Радуйтесь, нищетою временною богатство вечное улучившии.

Радуйтесь, яко память ваша с похвалами до днесь во Святей Церкви.

Радуйтесь, яко имена ваша честна и благословенна в пастве вашей.

Радуйтесь, Российския страны благодатное удобрение.

Радуйтесь, града Суждаля сокровища пребогатая.

Радуйтесь, соборнаго храма Богоматере первейшая украшения.

Радуйтесь, подателие неоскуднии исцелений.

Радуйтесь, источницы неистоцимии чудес.

Радуйтесь, молитвами вашими спасающии нас от всяких бед.

Радуйтесь, святителие Феодоре и Иоанне, предивнии чудотворцы.

### **Кондак 5**

---

Боготечней звезде подобен был еси, святителю Иоанне, сиянием кротости твоея, мрак злобы и клеветы разогнавый. Егда бо клеветницы лукавии на тя возсташа, и на

изгнание поносное ты осудиша, ты молитву усердную о них ко Господу принесл еси, и став пред всеми людьми Суждальскими руце твои преподобныя горе воздвигл еси: и абие клеветницы твои слепотою объяти быша, и вину свою пред всеми исповедаша, людие же вси, заблуждение свое познавше, прощения у тебе просиша и на престол святительский с честью ты возвратиша. Ты же и врагов твоих ослепших помиловал еси, и исцеление им подал еси, зовущим в покаянии глубокоцем: Аллилуиа.

### **Икос 5**

---

Видим вы, святителие Христови, очами веры у Престола Божия предстояция и за нас грешных молящияся, и вашим заступлением обретающе в скорбех утешение, в недужех исцеление, в бедах скорое вспоможение, величаем возвеличившаго вас Царя Славы Христа, вам же, теплым предстателем нашим, от любве сердечныя вопием:

Радуйтесь, ангелов сожителие.

Радуйтесь, святых всех приснии друзи.

Радуйтесь, Божия благодати таинницы.

Радуйтесь, во благоухании святыни  
почивающие.

Радуйтесь, вся благая прошения наша  
исполняющие.

Радуйтесь, скории утешители скорбных  
сердец.

Радуйтесь, скоропослушливии предстатели  
сущих в бедах.

Радуйтесь, старых в изнеможении  
укрепление.

Радуйтесь, юных к благочестию утверждение.

Радуйтесь, младенцев милостивии  
наказателие.

Радуйтесь, грешных к покаянию наставницы.

Радуйтесь, святителие Феодоре и Иоанне,  
предивнии чудотворцы.

### **Кондак 6**

---

Проповедника богопросвещенна и апостолом  
Христовым единокравна, вемы тя святителю  
Феодоре: благодать бо Господня излися во устех  
твоих, преподобне, и дар Божий спасительный,  
по имени твоему, воистину был еси людем  
Суждальским, словом и примером

равноангельского жития твоего приводя их к познанию Христову, и поучая сердцем и усты воспевати Спасителю мира: Аллилуиа.

## **Икос 6**

---

Возсиясте отцы всеблаженнии, в стране Суждальстей, светом добродетельнаго жития вашего, яко светила богосветлая, и просветисте ночь глубокую идолослужения, лучами познания Христова: но и ныне, аще вратами смерти и во гробы снидосте, не престаете озаряти наша темныя души благодатными лучами, да вас немолчно ублажаем благохвалении сицевыми:

Радуйтесь, милость и сострадание ко всем являющии.

Радуйтесь, тяжкия грешники от рова погибельнаго исхищающии.

Радуйтесь, пастырие добрии, присно готовии спасти от бед словесную вашу паству.

Радуйтесь, волку душегубительному не попускающии расхитити Богом врученное вам стадо.

Радуйтесь, звезды непрелестнии, путь ко спасению нам верно указующии в житейстем плавании.

Радуйтесь, облацы росоноснии, зной страстей наших прогоняющи.

Радуйтесь, фимиам молитв за нас Богу приносящи.

Радуйтесь, сладкою вонею благоухания Христова, сердца наша услаждающи.

Радуйтесь, венцами рукою Вседержителя украшеннии.

Радуйтесь, на Небеси Престолу Владычню покланяющися.

Радуйтесь, собеседницы пресветлых горних сил.

Радуйтесь, заступницы усерднии земнородных.

Радуйтесь, святителие Феодоре и Иоанне, предивнии чудотворцы.

### **Кондак 7**

Хотя Господь явити житие твое ангелоподобное, отче Иоанне, благоволи послати сослужебника тебе во время совершения Божественныя Литургии, ангела святаго, егоже видети сподобився благоверный князь Суждальский Борис, позна тя избранника

Божия и великаго иерарха Христова, достойнаго еще во плоти сослужения ангельскаго, и о сем благодарственно возгласи ангелов и человеков Создателю: Аллилуиа.

## Икос 7

Новопросвещеннии люди Суждальстии вас обретоша святителие Божии, пестуны искусныя и попечители ревностныя, на спасения стезю их наставляющия, и всяку тьму нечестия сиянием учений ваших разгоняющия. Темже яко проповедников благословенных, мы чада суще оных, ихже вы ученьми своими ко Христу приведосте, ваши труды и подвиги усердно поминаем, и зовем:

Радуйтесь,           Троицы           Живоначальныя  
священнотаинницы честнии.

Радуйтесь,           таинств           божественных  
совершители непорочнии.

Радуйтесь,           немудрых           наказателие  
благоискуснии.

Радуйтесь,           языческаго           нечестия           крепцыи  
искоренители.

Радуйтесь,           сеятели           благочестия  
христианскаго предобрии.

Радуйтесь, нивы Господней делателие  
трудолюбивии.

Радуйтесь, вернии раби Небеснаго  
Домовладыки.

Радуйтесь, Учителя Христа ученицы  
добропослушливии.

Радуйтесь, смирения Его нелицемернии  
подражатели.

Радуйтесь, кротости Его вернии  
последователи.

Радуйтесь, любовью Его преисполненнии.

Радуйтесь, милосердие Его себе стяжавшии.

Радуйтесь, святителие Феодоре и Иоанне,  
предивнии чудотворцы.

### **Кондак 8**

Странник и пришлец в земли Суждальстей  
был еси, святителю отче Феодоре, вышняго  
града Иерусалима Небеснаго зыскуя  
злострадании многими, и сия мужески  
претерпевая любве ради Христовы, ово от  
потемненных злобою идолослужителей, ово же от  
исконнаго врага спасения человеческого, егоже  
всю силу терпением крепким и молитвами

непрестанными до конца победил еси, и ныне со ангелы и мученики песнь победную поеши Подвигоположнику Христу: Аллилуиа.

### **Икос 8**

Всем к вам молитвенно прибегающим, чудотворцы святии, любовь и благосердие ваше обильно являете, и многажды самая прошения наша исполнением предваряете: ибо дадесе вам велия благодать от Господа, болезни исцеляти, духи нечистыя изгоняти, разслабленныя возставляти, яко воистинну преемником апостольским и верным последователем Евангелиа Христова, Егоже обетования неложная туне подаете всем требующим дары целебныя, и за сие слышите пение таковое:

Радуйтесь, маслины благоплодныя, елей милости Божия нам источающии.

Радуйтесь, кедри благосеннолиственнии, в зной страстей нас покрывающии.

Радуйтесь, крини благовоннии небеснаго прозябения.

Радуйтесь, чудная дрeвеса рая Иисусова.

Радуйтесь, плод сторичный принешии на пажити Святыя Церкви.

Радуйтесь, вертоград Церкви Святыя труды вашими благовозделавшии.

Радуйтесь, новосаждения спасительная в нем возрастившии.

Радуйтесь, благословия органи изряднии.

Радуйтесь, евангельския проповеди трубы доброголасныя.

Радуйтесь, истиннии хранителие апостольских преданий.

Радуйтесь, Суждальския церкви украшение неотъемлемое.

Радуйтесь, святителие Феодоре и Иоанне, предивнии чудотворцы.

### **Кондак 9**

---

Всею душею возлюбив избранника Божия Евфимиа, ты отче Иоанне, был еси ему помощник усерден в устроении обители его святыя, и друг присный во вся дни живота твоего. Темже ныне, в обителях горних вкупе обретше вечное блаженное упокоение, неразлучно в Бозе пребываете, и поете святых святейшему Слову: Аллилуиа.

---

## Икос 9

Витии многовещаннии и доброгласнии не возмогут воистинну изрещи все обилие чудес ваших, угодницы Божии, имиже при жизни и по смерти прославистеся от Господа, и прослависте имя Его Святое в стране Суждальстей, еяже просветители и хранители соделастеся благоволением всех Творца, подвизающаго нас вопити к вам хвалебно:

Радуйтеся, рукою крепкою люди Суждальския ко спасению путеводившии.

Радуйтеся, к спасительному познанию Христову тех приведшии.

Радуйтеся, яко Петр и Павел мрежею проповеди евангельския души человеческия уловившии.

Радуйтеся, апостольски страну Суждальскую светом богопознания просветившии.

Радуйтеся, чудесы преславными проповеданнаго вами учения истину засвидетельствовавшии.

Радуйтеся, всякое нечестие языческое истребившии.

Радуйтесь, православия святыя догматы  
незыбленно утвердившии.

Радуйтесь, яко вашим предстательством и до  
ныне град ваш в православии нерушимо  
пребывает.

Радуйтесь, орли небеснии, крилами молитв  
ваших от бед нас покрывающии.

Радуйтесь, теплотою любви вашея нас  
согревающии.

Радуйтесь, пищею нетленною слова Божия  
нас напитавшии.

Радуйтесь, святителие Феодоре и Иоанне,  
предивнии чудотворцы.

### **Кондак 10**

---

Спасительнаго учения Христова  
великопроповедник и чудотворец показался еси,  
святителю Феодоре, и свято пожил еси на земли  
в подвизах и трудех непрестанных, возвращая  
посеянная тобою в стране Суждальстей семена  
благочестия Христианскаго, во еже принести им  
плод сторичный твоим благопопечением. И тако  
совершив подвиг свыше тебе назначенный, в  
старости маститей прешел еси к обителем

небесным, со ангелы пети Триипостасному Богу:  
Аллилуиа.

## Икос 10

Царя Небеснаго Христа служителие изряднии  
и воины добропобеднии, святителие  
божественнии Феодоре и Иоанне, темную силу  
душегубителя диавола крепко поправшии, и  
венцы победными свыше увенчаннии,  
подвизаете чудесы вашими верных соборы  
прославляти песньми духовными, подвиги  
святаго жития вашего, имже чудящися, от любве  
сердечныя восклицаем вам радостно:

Радуйтесь, земнии ангели и небеснии  
чловецы.

Радуйтесь, на небеси и на земли от Господа  
прославленнии.

Радуйтесь, блага нетленная унаследовавшии.

Радуйтесь, дары благодатныя щедро  
раздающии.

Радуйтесь, душевных и телесных недугов  
добрии целебницы.

Радуйтесь, милостивии страны Суждальския  
покровителие.

Радуйтесь, скорое вспоможение в бедах сущим являющие.

Радуйтесь, присно готовии на умоление прогневаннаго грехми нашими Творца.

Радуйтесь, со дерзновением многим предстательствующии за нас пред Престолом Вседержителя.

Радуйтесь, умилоствители известнии Небеснаго Отца.

Радуйтесь, непрестанно ходатайствующии пред благостию Его о мире всего мира.

Радуйтесь, праведно движимый на нас гнев Его молитвами вашими утоляющие.

Радуйтесь, святителие Феодоре и Иоанне, предивнии чудотворцы.

### **Кондак 11**

---

Пение Пресвятей Троице в безмолвии ненарушимем возносити возжелев, святителю отче Иоанне, оставил еси престол твой святительский, и заключился еси в обители иночестей, да един Единому возлюбленному ти Иисусу послужиши в безмолвии и молитвах непрестанных, богомыслием восходя к совершенству духовному, и приуготовляяся к

исходу радостному от земных к небесным, егоже  
улучив, со безплотными лики воспеваеши ныне  
вечнорадостную песнь Богу: Аллилуиа.

## **Икос 11**

---

Светоподательным светильником подобны  
честныя раки, содержащая в себе святыя и  
цельбоносныя мощи ваша иерарси Христови  
Феодоре и Иоанне: ибо свет невечерний  
возсияваете от них чудесы вашими, имже души  
наша просвещаются познанием силы Христовой,  
еюже ваша тлению не причастная телеса,  
дивная и преславная знамения содевают, и вся  
приглашают песнословити к вам сице:

Радуйтесь, смертию временною пришедшии  
к жизни вечней.

Радуйтесь, облеченнии в светлую одежду  
чудотворнаго нетления.

Радуйтесь, от гробов ваших исцеления  
неоскудно источающии.

Радуйтесь, и самим призыванием честных  
имен ваших недуги врачующии.

Радуйтесь, слепых просветители.

Радуйтесь, расслабленных укрепители.

Радуйтесь, хромым правохождение подающими.

Радуйтесь, немым дар слова низпосылающими.

Радуйтесь, глухим слух отверзающими.

Радуйтесь, бесноватых от насилия демонского освобождающими.

Радуйтесь, многообразных немощей исцелители.

Радуйтесь, всем нам в час смерти усерднии защитницы.

Радуйтесь, святителие Феодоре и Иоанне, предивнии чудотворцы.

### **Кондак 12**

Благодатных даров щедрии податели и милостивии отцы наши Феодоре и Иоанне, святителие всеблаженнии, Богу угодившии, и мзду небесную от Него восприявшии, и до ныне паству вашу отечески молитвенно назирающими и хранящими, молим вас, соделайте ны грешныя и недостойныя чада ваша, достойны последователи святаго жития вашего, и научите нас творити волю Божию, да покаянием очищени пред Господем, сподобимся вкупе с вами воспевати Ему на земли живых: Аллилуиа.

## Икос 12

Поюще многая и преславная чудотворения  
ваша, угодницы Божии, поминаем велию любовь  
вашу к пастве вашей земной, юже при жизни и  
по смерти показасте, и покланяемся с любовию  
нетленным и многоцелебным мощем вашим,  
пред ними же яко живым вам сущим с нами, от  
усердия к вам вопием:

Радуйтесь, благодетели наши, блага  
временная и вечная нам свыше подающие.

Радуйтесь, покровители наши, покровом  
молитв ваших, от всякаго зла нас соблюдающие.

Радуйтесь, руководители наши к горнему  
Иерусалиму нас путеводящие.

Радуйтесь, предстатели наши, от враг  
видимых и невидимых нас избавляющие.

Радуйтесь, сокровища нетленная, богатством  
милости вашей нас обогащающие.

Радуйтесь, одушевлению храмы Святаго  
Духа, дарами Его светло блистающие.

Радуйтесь, Пресвятая Троицы вернии  
служители и угодницы.

Радуйтесь, Пресвятыя Богородицы избраннии раби и угодницы.

Радуйтесь, архангелов и ангелов достойнии собеседницы.

Радуйтесь, пророков и апостолов истиннии подражатели.

Радуйтесь, великих учителей и святителей честнии последователи.

Радуйтесь, преподобных и праведных блаженнии сонаследницы.

Радуйтесь, святителие Феодоре и Иоанне, предивнии чудотворцы.

### **Кондак 13**

---

О чудотворцы предивнии и врачеве благодатнии, святителие Христови Феодоре и Иоанне! Зрите наша скорби и беды, наша болезни и озлобления, и благоутробно вонмите малому сему молению нашему и песнословию смиренному, еже милостивно приемше умолите всех Творца и Господа, избавити нас скорбей и болезней временных и вечных, и сподобити нас недостойных со ангелы и всеми святыми во Царствии Небеснем, пети Богу: Аллилуиа.

*Этот кондак читается трижды, затем икос 1-й и кондак 1-й*

## **Молитва**

---

О велиции угодницы Христови и чудотворцы, святителие Феодоре и Иоанне! Се мы недостойнии и грешнии скорбьми многими угнетаемии, к вам усердно прибегаем, и с упованием крепким молимся: отцы богомилостивии и благопослушавии, милостивно услышите ныне глас наш молебный, и потщитесь на помощь нашу, и яко при жизни вашей всем скорбящим и озлобленным помощницы и утешителие бысте, тако и ныне любовь вашу к нам явите, благодатным действием благоприятных молитв ваших, претворяюще скорбь нашу в радость, печаль же на утешение: вся бо можете о укрепляющем вас Христе, Егоже вернии служители бысте; от Негоже приявше вся обетования благая, низпошлите и нам великую и богатую милость Господню, да воспоем и прославим дивнаго во святых Своих Бога, Отца и Сына и Святаго Духа, ныне и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
\* НЕБО**